

## TE HEEHURAA API

I neia i te piha neneiraa na te Ekalesia a Iesu Mesia i te Feia  
Mo'a i te Mau Mahana Hopea Nei i Papeete, Tahiti,  
i te mau fenua Sotaiete, i te mau avae atoa.  
Te hoo e piti farane i te matahiti hoê.

Nu. 7.

Tiulai 1930.

Mat. 24.

### Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo  
papaihia e Tamate Aposetolo; Faaauhia ei reo Tahiti e Elita.

*HIRO'A FAAROO 12. Te faaroo nei matou e, ia au-  
rarohia te mau arii, te mau peresideni, te mau faaterehau, e  
te mau haava, ia haapaohia, ia faaturahia, e ia faaturahia  
atu hoi te mau ture o te fenua nei.*

Uiraa 3. Eaha te haapiiraa na ta mau Aposetolo no nia  
i te faaturaraa'tu i te hau?

P. Ua papai atu Paulo i te rata ia Tito mai te parau-  
raa'tu e: "E faaite atu ia ratou, e e auraro maite i te hui  
haava ra, e faatia i te mau ohipa maitatai atoa ra." (Tito  
3:1) E rave rahi atu â ta'na parau no te reira. A taió i  
te Roma 13:1-7; I Timoteo 2:13; Ephetia 5:22-23.

Ua aó hua'tu hoi Petero i te parau i te na ôraa e: "E  
auraro outou i te toroa o te taata atoa i te Fatu nei; i te  
arii ra ei nia roa iho ia, e te mau tavana ra, ei feia tonohia  
e ana ei tahoo atu i te feia i rave i te ino ra, e ei haamaitai

i te feia i rave i te maitai ra. O to te Atua ia hinaarō, ia opani outou i te vaha o te ite ore o te taata maamaa ra i ta outou parau maitai. Ei feia tiamâ outou, eiaha râ taua tiamâ no outou ra e faarirohia ei tapoi parau ino, ei tavini râ outou no te Atua. E faaturatura'tu i te taata atoa. E aroha'tu i te hui taeae. E mataú i te Atua. E faateitei i te arii." (I Petero 2:13-17)

*Parau Tauturu:* Te vai ra paha te tumu no te mau parau mai teie te huru, no te mea, tei raro ae to Iuda'i to Roma e te imi ra Roma i te otoheraa ia hamani ino noa ia ratou; no reira ia haapao maitai ratou e tia'i. Te vai atura râ te tahi tumu no te reira, oia hoi te ture a te Atua i te taata. Ua faatiahia te hau ei tauturu na te taata e ua horoa mai te Atua i te hau i te mau taata maitai ei tauturu, ua riro râ te reira ei raau tairi i te feia ino e no reira, ia haapao maitai ratou atoa e tia'i.

Uiraa 4. Eaha ta te parau heheuraa e faaite mai nei no te faaturaraa'tu i te hau?

Te na ô maira te hoé ture i horoahia ia Iosepha Sêmíta i te matahiti 1831 e: "Eiaha roa e taata e ofati i te ture fenua, o tei haapao hoi i te ture a te Atua ra, e ore oia e tia ia ofati i te ture fenua; no reira, a auraro atu i te mana e vai nei, e tae noa'tu i te tau e hau, ai oia e na'na te mana o te hau, e a tuuhia atu ai te mau enemi atoa i raro aé i to'na avae." (Buka Fafau 58:21-22)

Ua farii-atoa-hia te parau i raro nei ei parau faaite no to te Ekalesia faaroo no nia i te faatereraa hau:

"Te faaroo nei matou e, e mea haapaohia e te Atua te mau faatereraa hau ei maitai na te taata, e e riro ratou i te titauhia mai no ta ratou ra mau ohipa no te reira, ei te haamaniraa i te ture e te faatereraa i te reira, ei maitai e ia vai hau te taata.

"Te faaroo nei matou e, aore e faatereraa hau e tia ia vai na mai te hau, maori râ ia faatupuhia te reira mau

huru ture e ia haamauhia mai te hapa ore ia noaa i te taata atoa te faataa-hua-raa i to'na manaó, ia noaa e ia haapao i te taoá, e i paruru no te ora.

“Te faaroo nei matou e e mea tia ia ei mau taata toroa e ei haava hoi to te mau hau atoa ei haapao i te ture no te reira, e ia maitihia hoi e tia ai te feia o te faatere i te ture i te parau au e te parau-tia, e ia paturuhia ratou e te reó o te taata atoa (mai te mea e repupirita), e aore râ no te hinaaro no te arii hoi.

“Te faaroo nei matou e, e mea haapaohia te faaroo e te Atua, e e hió tia te taata ia'na ra e ia'na anaé ra i te haapaoraa i te reira, maori râ ia faatupu ta ratou huru faaroo i te faahepo i nia i te tiaraa e te tiamaraa i ta vetahi ê ra; aore râ matou i faaroo e e mea tia ia faaau te ture fenua i te ture no te haamoriraa ei tapearaa i te manaó taata, e ia faaue i te mau huru o te mau haamoriraa huna e te vahi taata; ia tinai te haava fenua i te hara, e ore râ e tia ia'na ia tapea i te manaó taata; e faautua oia i te hara, e ore râ e tia ia'na ia tapea i te tiamâraa no te varua.

“Te faaroo nei matou e e mea tia ia faatia e ia paruru te taata atoa i te mau hau i te mau vahi atoa ta ratou i parahi ra, a paruruhia ai ratou mai te tia mauhia e te ture a te reira mau hau, e mea tia ore te tiarepu e te orure hau i te feia atoa o tei paruruhia e ratou, e ia faautuahia te reira e tia ai i te utua e au; e mea tia hoi i te mau hau atoa ia faatupu i te mau ture ta ratou i manaó e ei maitai te reira na te taata atoa, ia vai moá e te tiamâ noa ra te manaó.

“Te faaroo nei matou e, ia faaturahia te taata atoa i roto i to'na ra tiaraa; te mau faatere hau e te mau haava i to ratou tiaraa i haapaohia hoi ratou ei arai i te feia hara ore, e ei faautua i te feia rave hara; e ia faatura te taata atoa i te ture mai te haapao i te reira, ia ore hoi te reira e

riro te hau e te maru i te monohia i te orure hau e te mataútaú: I faatupuhia ai te ture a te taata nei, ia faaau i te mau huru ohipa atoa a te taata nei, ta te mau nunaa e ta te taata rii atoa hoi, i te taata e te taata, e te mau ture moá hoi o tei horoahia mai no te raí mai i te faataaraa i te mau haapaoraa no te pae varua, no te faaroo e te haamoriraa, ia haapao apipitihia e te taata i mua i tei Hamani ia'na ra.

“Te faaroo nei matou e, ua haapaohia te mau faatere hau, te mau tufaa e te mau hau ei faatupu i te ture ei arai i te taata atoa i hinaaro no te mau haamoriraa; aore râ matou i faaroo e e mea tia ia opanihia mai te reira, e ia faaue mai i te taata ia rave i tei ore i au i to ratou iho ra mau manaó, mai te mea e ua haapaohia e ratou e na tura ia ratou te mau ture, aore hoi te reira huru faaroo i faatia i te afata e te amui e te opuaraa i te parau ino.

“Te faaroo nei matou e, e mea tia ia faautuahia te mau raveraa hara atoa ra i tei au i te huru no te hara i ravehia; te taparahi taata, te orure hau, te vavahi fare, te eiâ, e te faaturepuraa i te tau hau ra, i te mau huru atoa ra, ia faautua-anaé-hia ia mai tei au i te rahiraa no te hara, e te rahiraa no te ino e tupu i rotopu i te taata, ia au te utua i tei au i te ture no te fenua i ravehia ai taua hara ra; e ei maitai no te taatoa, e ei faaearaa maitai, ia tia paatoa mai te taata atoa e rave i tei au ia ratou e tia ai, mai te afai i te feia e ofati na i te ture maitatai, ia faautuahia na.

“Aore matou i faaroo e e mea tia ia faaanoihia te haapaoraa no te paieti i ta te hau ra mau haapaoraa, e ia paturuhia hoi te tahi totaiete no te pae faaroo, e o te patoihia atu te tahi i te raveraa i te mau ohipa no te faaroo, e te parau tia no te mau melo ei feia no te oire, ua faaorehia ia.

“Te faaroo nei matou e, e mea tia ia haapao te mau totaiete no te faaroo, i to ratou mau melo ia haapao atoa

ratou mai te au i te mau ture e te mau haapaoraa no te reira mau totaiete, mai te mea e, ua haapaohia te reira huru ohipa no te au e te tiaraa maitai; aore râ matou i faaroo e, e tia i te hoé totaiete no te pae o te faaroo ia haava i te taata no te taoá e no te ora, ia rave mai ta ratou na roto na roto mai i to teie nei ao ra faufau e ia haamataútaúhia ratou i te ora e te mau melo atoa, eiaha hoi ia faautua i te hoé utua tairi i nia ia ratou, e tia noa ia ratoa ia faataa ia ratou mai rotopu mai i ta ratou mau totaiete e ia tia ê mai mai roto mai i to ratou au.

“Te faaroo nei matou e, e mea tia ia horo te taata i te ture fenua ia imihia te mau hapa atoa e te mau inoinoraa atoa, i te mau vahi atoa i te ratou hamani-ino-raa-hia e te taata, e te tiaraa no te taoá e te roo ia faainohia, i te mau vahi e vai ai te ture ei arai i te reira; te manaó nei rá matou e e faatiahia te taata o te arai ia ratou iho, i to ratou mau taata tupu e te taoá atoa hoi, e te hau hoi, i te mau pariraa haavare e te faaeneraa mai no te taata atoa i te mau taime e ati ai ra, o te ore e tia ia horo oioi atu i te mau ture e a faufaahia atu ai.

“Te faaroo nei matou e, e mea tia ia ooro i te Evanelia i te mau nunaa atoa no te ao nei, e ia aó atu ai i te feia faaroo ia faaora ia ratou iho i te mau ino no te ao nei, aore matou i manaó e, e mea tia ia haapeapea noa atu i te mau tavini-i-hoohia, eiaha hoi ia aó atu i te Evanelia e ia bapetizo atu ia ratou mai te tia-ore-hia e to ratou ra mau fatu, eiaha hoi ia haapeapea noa’tu ia ratou ia tupu to ratou au ore i to ratou tiaraa i teie nei oraraa, e no reira ua mataútaú noa i te ora o te mau taata; te manaó nei matou i te reira e mea tia ore e te au ore i te ture, e e riro te reira ei faatupu i te peapea rahi o te mau hau atoa o tei faatia i te taata ia rave-titi-noa-hia na.” (Buka Fafau 134:)

(E Tuatihia teie nei parau.)

## Te Paturaa la Ierusalemapi

## TE IERUSALEMA API

Te hinaaro atoa nei au i te taió i te tahi parau i roto i te Buka a Moromona tei au i nia iho i te mau vahi ta tatou e parau nei: o te parau hoi teie a te Faaora iho, Ta'na i haapii i rotopu i te Ati Nephi i te fenua Amarika, e te parau no te mau mea e vai ra i mua ia tatou nei i te na ôraa mai e, "E riro vau i te haamau i to'u ra feia, e te utuafare o Iseraela e. E inaha, e haamau Vau i teie nei feia i nia i teie nei fenua, ia faatiahia te faufaa ta'u i fafau i to outou metua ra o Iakoba; e riro ia ei Ierusalemapi. Ei reira e vai noa'i te mana no te ra'i i roto i teie nei feia, ei roto vau iho hoi ia outou." (3 Nephi 20 :21-22)

E ua parau faahou Oia i roto i te pene i muri iho no te mau taata te parahi i nia iho i taua fenua ra, ia ratou e parauhia no te tatarahapa: "Ia tatarahapa râ e ia faaroo i ta'u ra parau, ma te faaetaeta ore i to ratou aau, ei reira, e faatia'i au i ta'u Ekalesia i rotopu ia ratou, e e tae ratou i roto i te faufaa, e e amuihia i te toeâ no Iakoba, o ta'u i horoa'tu i teie nei fenua e aiâ no ratou. E na ratou e tauturu i to'u ra feia, o te toeâ no Iakoba, e to Iseraela haere maira, ia patu ratou i te hoé oire, o te parauhia i te Ierusalemapi; E reira e tauturu ai ratou i to'u ra taata i purara i te fenua e ati noa a'era, ia putuputuhia ratou i roto i te Ierusalemapi. Ei reira e tae mai ai te mana no te ra'i mai i roto ia ratou, e e parahi ai au i rotopu ia ratou; (3 Nephi 21: 22-25 )

## TE FAATUPURAA I TE MAU OPUARAA A TE ATUA

E mea nehenehe ia hió tatou i te mau opuaraa a te Atua, eiaha ra te mau ohipa Ta'na i rave i teie hoé hanere matahiti i mairi a'e nei ana'e, ia feruri ra tatou i te mau mea e vai nei i mua i te Ekalesia. Te haamataraa hoi i te tuu-

raa parau rahi no te mau tau atoa, e no te faaotiraa i ta te Atua ohipa. Teie ia te auraa, e faaorahia te feia Ta'na i fafau i mua'tu, e te haaputuputuraa ia ratou i te vahi hoé, e te horoaraa i te fenua tei horoahia i to ratou hui tupuna. Teie hoi te auraa, e hoí te Ati Iuda i Paletine, mai te au i ta ratou e na reira nei. Na teie tamaí rahi a'e nei i faahuru ê i te mau faatereraa fenua, e na te reira hoi i faatupu i te parau a te mau Peropheta. Na te reira i tuu ia Palatine i raro i te faatereraa o te hau Baretane; e ua ite tatou e, te pae rahi o te mau taata Baretane, na roto mai ratou i te na opu hoé ahuru o Iseraela tei afai títíhia'tu e Salamanezera.

E na roto i teie mau ravea huru ê te faatupu nei te Atua i Ta'na ra mau opuaraa, i te haamataraa i te hoé ohipa mai te reira te huru aita tatou i ite i te tumu, e aita tatou i ite i te maitai i reira, ia fatata ra i te oti, i reira tatou e ite ai e, o te faaotiraa ana'e hoi te reira i te mau opuaraa a te Atua.

### EIAHA E HIERO NA TE ATUA

Ia haamaitai te Atua ia outou, te mau taeae e te mau tuahine. Eiaha outou e faatia i teie parau no te paturaa i te hiero i Iakasona, i Misori ei tafifiraa i to outou manaó. E patuhia "paha" te hoé fare e teie feia ta'u i parau ra, e ere ra e hiero, e ore roa hoi e fariihia e te Atua ora ra. Te hoé o te mau ohipa matamua ta te Ati Nephi i rave i to ratou taeraa i te fenua Amerika, o te paturaa ia i te hoé hiero, e ua patu ratou i te reira mai te au i te hiero o Solomona. Ua moé ia ratou te Atua, e ua faarue ratou Ia'na e ua haamari ratou i te mau idolo, e ua tae roa to ratou faufau i te pûpûraa i te taata ei tutia. I to Herenana Coretese (Hernán Cortes) taeraa i te fenua Mexico, ua ite oia i te mau hiero rarahi i reira tei faatiahia no te haamoriraa i te Diabolo' ua farii hoi ratou, e te haamori ra ratou te Dia-

bolo i te na ôraa mai e, te haamori nei matou ia'na, eiaha ra no to matou here ia'na, no to matou mataú ra, matou i haamori ia'na. E ua na ô maira ratou e, ua fâ maira Oia ia ratou i roto i te tino taata nei, e ua haapii atu Oia ia ratou i te raveraa i ta ratou ohipa; e te manaó nei au e, e parau mau ta taua mau taata ra. E mau hiero ihoâ ta ratou i haamani, eiaha ra, i i fariihia e te Atua ora ra. Te vai ra i reira, i Tazicoco i tahatai i te paeroto i rapae au rii i te oire rahi i Mexico, te hoé fare nainai e aita to reira e idolo, aita atoa te pûpûraa taata ei tutia, na tuuhia ra te mau tiare i roto i taua fare ra, e i nibia'tu ai ia ratou e, ua patuhia teie fare no vai ra, ua pahono maira ratou e, ua patuhia teie fare no to ratou Atua tei tae mai ia ratou i te matamua e ua haere ê; ua parau ra Oia, e hoi mai Oia, e te tiaí nei ratou ia'na, oia hoi te taata tei hapii ia ratou te aroha e te here i te tahi i te tahi, e eiaha ratou e tamaí faahou. Te toeâ hoi teie no te Evanelia a Iesu Mesia tei vaiihohia i rotopu ia ratou, e te tiaí nei ratou i To'na hoíraa mai.

Te ani nei au i te mau haamaitairaa o te Atua i nia iho ia outou, na roto i te i'oa o Iesu Mesia, Amene.

*Faaahia ei reo Tahiti e Roroma*

## Te Mau Parau Api

### TE TAEHAE RAHI O TE MA'O

I te mahana toru i 16 no Eperela, 1930, ua tere mai e piti taata mai Nukutavake mai i Pinaki na nia mai i te vaa. Teie to raua tau i'oa, 1 Tuko â Miti, 2 Taihuka â Tekakeahara. Ua tae mai raua i Pinaki nei, e ua hoí faahou atura i Nukutavake i taua mahana ihora e te tahi mau taata i nia hoi, teie te mau taata i nia i te vaa, 1 Tuko â Miti, 2 Taihuka â Tekakeahara, 3 Varoa â Teuira, 4 Temageo â Ioane V. 5 Tehega V. Ioane, 6 Haranui â Ioane. Teie te huru o to ratereraa. Ua tere atura ratou e tae atu i te afatia no Pinaki

e Nukutavake. Ua faaroo ratou i te haruru i raro a'e i te vaa, ua hió ihora ratou; e maó! E i reira ihora, ua horo atura te maó i muri, e ua hoí faahou mai na muri mai i te vaa, e fatata roa maira, ua iriti a'era Tuko i te hoe faatere vaa. Ua patia atura na roto i te vaha o te maó ua hohoni ihora te maó i te hoe e ua taviri noa te maó na nia i te hoe. E maoro a'era ua faarue maira te maó i te hoe. Ua haere te maó na muri iho e ua huri atura ratou i ta ratou pape haari i roto i te miti, aita ra te maó i amu. E i reira ihora ua faatere atura ratou i te vaa e ua tapapa mai e maó i te vaa. Ua titapou ratou i te vaa i raro, ua na reira atoa te maó i te tapaparaa i muri mai, ua tapiri ratou i te mataí, i reira ua moé atura te maó ia ratou; e i reira ua faatere tano maitai atura i te vaa i Nukutavake, e ua tae atura ratou i nia i te fenua mai te maitai.

*Faauhia teie pgrau e Taiepo a Tamaku. Papaihia e Tepoheiva a Fareata.*

### E TIHOTA API

Na roto i te hoé mau ravea apî tei itehia i teie mau mahana, ua roaa mai te tihota na roto mai i te huero vavai e te paa aratita. Ia iritihia te hinu na roto mai i te huero vavai, i reira, ua rave hia te toeâ e ua iritihia te tihota. Na roto i te hoé tane paa aratia aore ra te hoé tane paa huero vavai e roaa mai e 250 kilo tihota.

### NOA'TU TE UA

Noa'tu te ua, ua nehenehe i teie nei no te mau pahi auahi i te hari i uta i te mau mea mai te faraoa e te tihota te huru. I te fenua Autaleia, ua tamatahia te hoé ravea, oia hoi, ua hamanihia te hoé paruru ie, e ua hutihia i nia i te tira e ua patiahia i te hoé raau i te aoao no te pahi ia vai noa te paruru i nia aé i te hati e te uahu atoa hoi.

*TE HAAMOUHIA NEITE MAU ANIMALA TAEHAE*

I teie mau avae toetoe, i teie iho â matahiti nei e i te hopeá o te matahiti 1929, i te fenua Samon River, Idaho, ua taparahihia e 29 Liona e e 87 Coyote (uri taehae). E mau enemy rahi roa teie mau animala taehae no te mamoe e te puaatoro. Ua tupu te hinaaro o te mau taata faaapu ia haamou i teie nei mau Liona e te Coyote, ia tia ia ratou ia tuu i ta ratou mau mamoe e ta ratou mau puaatoro i nia i te mouá i te tau mahana.

*TE MAU OIRE TAHITO I TAPOIHIA*

I te fenua Mexico ua itehia te hoé mau oire i tapoihia i te repo i te anotau tahito, e i teie nei, te opua nei te hoé mau taata ia iriti mai i te repo no nia iho i teie nei mau oire i tapoihia fatata i te hoé tauatini matahiti i mairi a'e nei mai te au i manaóhia e te hoé mau taata. E ravehia teie ohipa ia hiopoá te mau taata tei ite i te mau faea hohonu i te huru o te ohipa i ravehia i te tau no te mau taata tei faatia i teie nei mau oire, e ia haapii i ta ratou mau peu e ta ratou mau ravea paari, e i reira e itehia'i te huru mau o te mau taata i taua anotau ra. Ua itehia te hoé mau menema ofai i faatiahia mai te hohoá o te tiahapa, tirara, e mau mene-ma rarahi roa. E mai te au i te parau a te mau taata paari, ua na mua roa teie mau menema i te faatiahia e na muri mai to Aiphiti ra, e ua ite tatou e, ua faatiahia te hcé pae o to Aiphiti mau menema i te tau no Iasepha i hoohia i Aiphiti ra. Ua ite-atoa-hia te hoé mau fare pureraa rarahi e te nehenehe roa, ua faatiahia teie mau fare hou roa te mau fare mai teie te huru i faatiahia'i i te fenua Europa. E hōma e, na teie nei mau mea e faaite mai ia tatou e, e parau mau ta te Buka a Moromona, e ere te fenua Amerika e fenua apî roa mai te au i manaóhia e te mau taata i te taima i neneihia'i te Buka a Moromona matamua e hoé hanare matahiti i mairi a'e nei.

*E MEA PORIA HOI*

Te vai ra i te oire, Selem, Massachusetts, i Amarika, te hoé tamaiti, o Gihoti Tetrault ia to'na i'oa. E ono noa iho ia to'na matahiti, area-ra ua tae to'na faito i nia a'e i te hoé hanere kilo. E mea maere mau teie, no te mea, eita te faito no to'na na metua e haere hau a'e i te ono ahuru ma pae kilo.

*E VAU AHURU MA VAU TEI POHE*

I Dallas Texas, Amarika, i te 7 no me, ua taióhia e 88 tei pohe i roto i te hoé vero mataí. Ua hanare noa'tu te mau taata tei haapepehihia i roto i teie mataí tei haere na te pae i ropu o te tufaa feua ra, o Texas. Ua huru rahi hoi te mau oire nainai tei haamou-roa-hia. I te oire o Frost, ua rahi atu ai i te 20 tei pohe, e aita hoé fare o te vai maitai nei na muri a'e i teie nei mataí. E rave rahi atu â te mau oire tei haamou-roa-hia. I te taeraa mai o te mataí, horo vitiviti i hora te mau taata i roto i te mau apoo paruru i raro a'e i to ratou mau fare. I te oire ra, o Frast, te faaterehia ra te haapiiraa i te taeraa mai o te mataí, horo vitiviti i hora te mau tamarii i raro a'e i te fare i roto i te apoo paruru, i to ratou taeraa i reira, pee atu te tapoi fare i te mataí, topa maira te pae fare ra i raro roa. Ua i roa te mau fare mai i te mau taata tei haapepehihia i roto i teie nei vero. Ua afaihia ratou tei pohe i roto i te hoé fare rahi ia haapapuhia to ratou mau i'oa e to ratou faaearaa e i reira ua tannhia'i. Ua haere te mau taote e te mau tuati i roto i te mau pereoo mai, i te mau vahi i haamouhia e te vero, ia tauturu atu i to reira mau taata, mai te afai atu i te maa e te ahu ia ratou ra. I te taime i papaihia teie nei parau, aita i papu te rahiraa o te taata i pohe ra o tei ore i itehia ra.

## TE UTE MOROMONA

Ua fatata te hautiraa taura popo, rahi no te tau, i te hautihia i roto i te fare hautiraa rahi no te Y. M. C. A. i te oire ra, o Prague, te oire rahi i Czechoslovakia. Ua faanehenehe-maitai-hia te fare. I te hoé pae o te fare ua herehia te reva Marite, e tapao hoi no te tiamâ, e i te tahi pae, ua herehia te reva Czechoslovakia, e tapao no te tiamâ tei titau-maoro-hia e ua roaa mai ia ia ratou i teie nei. Ua iritihia te opani i te pae au fare ra, horo vitiviti maira na taata apî e ono. Ua faaahuhia ratou i roto i te ahu uteute, e i nia iho te piriaro, ua papaihia i roto i te mau rata uouo te parau UTAHA. Tia a'era te tiaa taata i nia, e ua pii hua mai i roto i te reó puai, "TE UTE MOROMONA." I reira, ua iritihia te opani no te tahi pae o te fare ra, e ua horo vitiviti mai te tahi pupu taata apî, e mau taata maitai hoi, ma te mau tino etaeta e te puai ra. Ua tia faahou te tiaa taata e ua pii faahou ratou ma te reó puai, "TE Y. M. C. A.". Aore roa teie pupu hopea i pohe i roto i te hoé o ta ratou mau hautiraa, e pupu numera hoé hoi. Ua tae mai te taata faatere ma te parau e, "o loane Brusel teie, te raatira no pupu Y. M. C. A.". I reira ua horoa mai loane i te hoé reva Czechoslovakia nehenehe roa i te raatira o te pupu UTE, mai te parauraa mai i roto i te reó Baretane. Ua parau faahou mai te taata faatere e, "o Ike Hart teie, te raatira o te pupu UTE". I reira ua horoa'tu Ike i te hoé reva Marite i te raatira o te pupu Y. M. C. A., e ua parau oia i ta'na parau i roto i te reó Czechoslovakia. Ua maururu roa to reira mau taata i te reira no te mea e, e mea varavara te taata ê tei ite i te reó Czechoslovakia. Ua haamata te hautiraa, e ua maitai roa, aore te hoé taata i riri i te hoé vahi iti ai. I te hopea, ua riro mai te rê i te pupu UTE, e ua pii puai mai te mau taata ia faaite i ta ratou maururu. O vai ra teie pupu UTE? E mau orometua Moromona ratou i tonohia i teie mau mahana nei ia haamata i te poro-hare-raa i te Evanelia a Iesu Mesia i taua fenua ra; e te rave maitai nei ratou i ta ratou ohipa.

---

M. Bonnet M. Gerant et Imprimeur,

Rue Brea et de la rue Dumont d'Urville, Orovini, Papeete